




ms. R


9880.

Publ. no.









❧ Traduction d'une Epistre

LATINE D'VN EXCELLENT

Personnage de ce Royaume , faicte

par forme de Discours , sur

aucunes choses depuis peu

de temps advenues

en France.



A P A R I S,

De l'Imprimerie de Federic Morel

Imprimeur du Roy.

1 5 7 3.

Avec Privilege dudit Seigneur.

Case

F

39

,324

1573 pi

THE NEWBERRY
LIBRARY



59-1196
CA

TRADUCTION D'UNE
EPISTRE LATINE D'UN
*Excellent personnage de ce Royaume,
faicte par forme de discours sur
aucunes choses depuis peu
de temps aduenues
en France.*

SEIGNEVR ELVIDE, Ie ne
sçauois estre si esbahy ne si eston-
né des estrâges nouuelles que vous
m'escriuez , & des meschants &
malheureux bruits que vous dictes
qu'on fait courir depuis peu de temps , au païs de
Pologne, où vous estes, & par toute l'Allemaigne,
sur l'estat & gouuernement des affaires de France,
veu la condition miserable du siecle auquel nous
viuons , & la partialité qui se trouue és esprits des
hommes de ce temps : Comme ie me plaindrois
maintenant & courroucerois volontiers contre
certains personnages, lesquels (ores qu'ils soient
gens de bien, de vertu, & de nostre party) si se mō-
strent ils estre peu accorts , & dignes d'estre blas-
mez d'imprudence, en ce que pour vouloir trop

chaudement tesmoigner l'affection qu'ils portēt au Roy Treschrestien , & le desir qu'ils ont de fopposer aux calomnies dont impudemmet par certains petits liures & escrits diffamatoires on a voulu charger l'honneur de sa Maiesté, se laissans tromper & abuser au premier venu, & se reposans sur ce qu'ils oyent & recueillent indifferemment de toute sorte d'hommes en estrange païs, negligents de s'enquerir soigneusement, & s'informer comme il appartient, de la verité de ce dont il est auiourd'hui question. Et entrent en la defense de la cause avec si peu de iugement, que tout ainsi que ceulx qui sont touchez au vif dans le cœur, & qui sont troublez en leur esprit de la passion d'amour, peu ou point s'apperçoient des laydeurs, imperfections, & deformitez des personnes qu'ils aiment, voire quelquefois se delectent & s'eschaufent de ce qui leur en deuroit plus desplaire: Aussi ces hommes icy, tout ce qu'on leur conte estre aduenue le vingt quatriéme d'Aoust dernier en ceste ville, ils le reçoient incontinent pour legitime & valable, sans faire aucune difference du vray au faulx, du bon au mauuais, & de ce qui a esté faict par l'ordonnance & commandement du Prince, ou contre sa volonté, par l'audace, insolence & entreprise de ceux qui n'auoient nulle loy ny autorité legitime de commander: Et ne considerent pas qu'en ce faisant ils donnent

vne grande prinse & aduantage à nos aduersaires
 sur nous, d'autant qu'il est bien certain, que plu-
 sieurs choses aduindrent ceste iournee là, qui me-
 ritent d'estre blasmees & reprises, & dont le Roy
 fut deslors infiniment courroucé, & par la bon-
 té, iustice & droicteure qui reluit en luy, voudroit
 maintenant volontiers les faire reparer, avec vn
 chastiment exemplaire, n'estoit qu'il craint que ce
 feust chose par trop rigoureuse & mal raisonnable,
 de desirer & rechercher exactement & avec ri-
 gueur, en vn populasse estourdy, la mediocrité &
 moderation, que les plus sages ne peuuent bon-
 nement obseruer : mesmement en vn temps, au-
 quel pour le peril & danger éminent où se trouuoit
 la personne du Roy, de la Royne sa mere, & de
 Messieurs ses freres, & vniuersellement l'estat de
 France, les esprits des hommes estoient merueil-
 leusement troublez & agitez de cholere, de fureur
 & de rage.

Vous sçaez, Seigneur Eluide, quel homme ie
 suis, & mes meurs & conditions vous sont assez
 cognues des mon adolescence, qui me gardera
 vous en dire d'auantage pour le present: si ce n'est
 que par vne ie ne sçay quelle foiblesse ou trop
 facile naturel, il ne m'est possible de porter & re-
 sister aux larmes d'autrui. Voire és iustes con-
 damnations & supplices des plus crimineux &
 coupables, ie me sens quelquefois si esmeu de

pitié & de commiseration, que i'en deuens ma-
 lade: d'où il vous fera bien aisé de penser, en quel
 estat ie pouuois estre lors, que par vn ou deux
 iours entiers plusieurs hommes furent occis &
 meurtris en ceste ville. Ie confesseray tousiours in-
 genuemēt, que le soudain & inopiné retour, & la
 vicissitude des choses, & aussi l'aspect lamentable
 & calamiteux de ceste florissante ville, tel qu'il
 s'offroit lors à mes yeux, me donna vne si ferme,
 si viue & si rude atteinte dans le cœur, que i'en
 versay maintes larmes, & en demeuray comme
 pasmé d'horreur: & croy certainement que ie
 feusse mort d'ennuy, sans deux choses qui me ser-
 uirent, en vne telle destresse & angoisse d'esprit,
 d'un prompt & salutaire remede. La premiere
 fut de ce, qu'au moyen de ma charge publique, &
 de l'vsage que ie puis auoir acquis par le manie-
 ment des negoces du monde, i'auois quelque pe-
 tite intelligence & cognoissance des affaires qui
 se passoient pour lors, & de la raison & equité qu'il
 y auoit en l'exécution d'une partie de ce que ie
 voyois: L'autre de ce, que ie sçauois certainemēt
 que les inhumanitez & cruantez qui estoient in-
 differemment exercees, & les voleries & pilleries
 des biens qui se commettoient en plein iour, se
 faisoient contre le conseil de la Royne mere, & de
 Messieurs freres du Roy, & contre le comman-
 dement tresexpres de sa Maiesté: & procedoient
 seulement

seulemēt de la legeretē du peuple, ou pour mieux dire, d'une telle tempeste & orage de cholere, que impossible estoit de la moderer par la raison, ny reprimer par la force, passant par dessus toutes les loix & la reuerence deuē au magistrat, sans crainte des peines cōtenues és criz & proclamations publiques, & sans pouuoir estre retenue & arrestee par les gardes du Roy disposees à cest effect, ne par la dignité & aūthorité de nostre Senat, ne par le commandement de ce tresgrand & trefclemēt Prince Monsieur le Duc d'Anjou, ne mesme (qui est chose bien estrange) par la presence & Maiesté du Roy.

Il aduient presque ordinairement (cōme vous sçauiez) que és seditions & tumultes, les hommes moins sages sont ceux qui ont plus de puissance & d'aūthorité: car le conseil des prudens n'est receu ny escouté, sinō lors que le temps est calme & tranquille. Mais aussi tost qu'en vne ville, où abordent des hommes de toutes parts & diuerfes nations, comme est ceste cy, la poincte de la fureur se mesle parmy les esprits de quelques vns, soudain, & quasi en vn moment, elle prouigne & s'estend à merueilles, passant de l'un à l'autre avec vne celerité incroyable. Et au moyen de la participation & contagion du mal, comme par vn solennel ferment, se faiēt vne liayson de courages & mutuelles volonteiz, qui agrādīt ce party

& luy donne des forces excessiues, dont il deuient de plus en plus insolent & redoutable. Et tout ainsi qu'une grosse riuere, quand elle est desbordée rompt & brise ce qu'on luy veult opposer, ou bien passe par dessus, & n'y a remede quelconque pour l'arrester, & ramener à son droit & ordinaire cours, que celui du tēps: aussi croy ie, que impossible est d'appaiser vne multitude effarouchee & sousleuee, mesmement pour occasion si grande & si bouillante, & la rāger au train accoustumé de sa vie, par autre voye que celle du iour. Adiouitez maintenant à ce poinct par forme de defense pour nous, si vous plaist, la consideration de nostre naturel, & le loz qui est comme hereditaire à ce peuple François. Il n'y eust oncques nation qui ait tant reueré ou plus sainctement & religieusement honoré l'estat royal, que la nostre, ne qui avec plus d'affection vehemente d'amour, & plus de fidelité, se soit maintenue & comportee à l'endroit de son Prince souuerain. Estre cogneu de luy, ou nommé par sa bouche, nous semble vn tresgrand aduantage pour nous, iusques à mettre en cela le comble de noz souhaits & felicité humaine. Et ores que par la bonté & humanité de noz Roys, ils soient de facile accez & rencontre, si est-ce que leur veuë nous semble tousiours estre chose nouuelle, & nous en reioissons comme de l'aspect d'un astre benin & nouveau. Il se pourroit
bien

bien par aduenture trouuer parmy les autres nations quelque peu d'hommes, lesquels au moyen de l'estude des lettres, & singulierement de la philosophie, peuuent recognoistre & remarquer en la personne & estat des Roys, ce qu'il y a de diuin & celeste, & qui voient à trauers leurs couronnes la marque sainte & caractere que Dieu y a voulu imprimer: & qui en la disposition, santé, seureté, & fortune des Roys scauent bien considerer & establir par leurs doctes intelligences le salut, seureté & felicité du peuple. Mais quant à nous François, la nature nous a en telle chose suffisamment enseigne & apprins, sans que nous ayons besoing d'aucun pedagogue, ne autre instruction de l'art de sapience, en cest endroit: car deslors que nous sommes nez, par le seul mouuement, instinct & adresse de la nature, nous sommes tous vniuersellemēt portez d'affection extreme à faire seruice à noz Princes souuerains, si nous en auons le moyen: ou, à faute d'iceluy, à ne penser & dire iamais chose qui ne tesmoigne la reuerence que nous leur portons, & la ferme créance & persuation que nous auons, que Dieu les a establis de sa main, & constituez sur nous pour nous gouverner & commander, & que les desobeissances & rebellions que lon commet enuers eulx, & les offenses qu'on leur fait, peuuent iustement, & doiuent estre vengees, non seulement

B

par le glaiue qu'ils portét, & que Dieu leur a donné, mais qu'elles seront encores plus rigoureusement chastices & punies au siege de la treshaulte & eternelle iustice de Dieu.

Ie ne scaurois péser de ma part, & vous supplie ainsi le croire, Seigneur Eluide, que la diurnité de ceste monarchie, & sa longue duree, qui surpasse de plusieurs siecles toutes celles dont nous est demeuré quelque memoire és histoires Grecques ou Romaines, ne soit procédée principalement du respect naturel, & de ceste reuerence non acquise par la leçon des liures, non estrangere & venue d'ailleurs, mais nee avec nous des nostre conception & succee avec le premier lait, de laquelle nous auons veu tousiours de merueilleux effects, & entre autres cestuy que ie ne veulx oublier, qu'estant iadis par la fortune & accident des guerres la pluspart de la France enuahie & occupée par les Anglois, ores qu'ils raschassent par tous moiens, & mesmes par vne douce & equitable façon de gouuernement (chose qui a beaucoup de pouuoir à l'endroiçt des hommes) attraire & gagner à soy la volonté, le courage & l'amitié des François: ce non pourtant, en l'espace de trente annees, ils ne peurent par leurs appasts & amorces aduancer ou profiter autre chose, que d'estre tenuz & reputez tousiours ennemis publics, & ne cessèrent d'estre en perpetuel soub-
con.

çon & effroy, iusques à tât que chassez de ce qu'ils detenoient iniustement, donnerét par leur exemple vne instruction memorable à toute la posterité, que les François ne sçauroient aymer ny endurer autre Roy, que celuy qui leur est naturel & legitime.

Or vous ay-ie bien voulu toucher ce poinct, à fin que d'adventure vous trouuât és compagnies des Palatins, Seigneurs & gentilshommes de Pologne, ou vous rencontrant à lire certains liures, qui ont puis nagueres esté composez en Allemagne, par quelques vns des nostres qui sy sont retirez, esquels on a assemblé toute sorte de blasmes & d'iniures pour cuider marquer & flestrir à iamais nostre renommee, il vous souuienne soudain, & vous plaise vous rememorer, que nous sommes François, procreez & yssus du sang de ceux dont ie vous ay parlé, ayans mesmes sentimens que noz ancestres, & ne leur voulans ceder en rien, singulieremét en l'affection de treshumble deuoir enuers les Roys & Princes, sous lesquels nous viuons : Qu'aussi tost que nous sommes aduertis de quelque tort qu'on leur vueille faire, ou du peril & danger où ils sont, nous nous alterons incontinent, & entrons en vne extremité de cholere, oublions & postposans tous respects pour les sauuer, secourir, & nous vanger de leurs ennemis : Que és iniures publiques nous

estimons n'estre loisible ny honnesté, d'observer aucune mediocrité ny moderation : que le plus grand crime que nous pouuons imaginer est celui de léze maisté : & en fin, que nul genre de supplice, nulle espee de cruauté pourroit assouuir la haine capitale & mortelle que nous portons à ceux, qui ont coniuré contre la personne de nostre Prince.

Es autres pais, peult estre, pour le grand nombre des hommes qui faillent ordinairement en cest endroit, & par ie ne sçay quelle accoustumance, ce crime est trouué moins grãd & moins estrange: mais, quant à nous, il nous est presque incogneu, incroyable, & le tenons comme chose du tout portenteuse & monstreuse. Car és registres & memoriaulx des iugemēs publicqs, & és histoires de tant d'annees, à peine trouuons nous vn ou deux hommes qui ayent esté soubçonnez d'vn faiet si malheureux & si detestable, encores les coniectures qu'on allegue contre eulx, & dont les actes iudiciaires font foy, sont assez foibles & legeres. Tant sen fault qu'il nous demeure aucun exemple de personne qui ait iamais esté trouuee conuaincue de ce crime si enorme: car la vertu qui est infuse & emprainte au sang & semence des François a tousiours reiecté & refuy vne telle infamie : partant se deuroit on moins esbahir maintenant, ce me semble, si à l'obiet & rencon-

tre de chose tant nouuelle, estrange & inusitée, nous nous sommes presque mis hors de nous mesmes, & si la cholere, dont l'impetuosité ne scauroit estre blasmee, quand elle est necessaire & employee pour l'vtilité commune, se recueillant en elle mesme, excitée d'une part de l'amour de la patrie, de l'autre costé allumee & enflammee de la charité enuers son Prince naturel, & de la crainte de le perdre, a produict des effects vn peu desreglez & extraordinaires: cōme ie delibere vous conter bien au long par ceste lettre, au plus pres de la verité qu'il me sera possible, si vous me faites ceste grace de la vouloir lire iusques au bout. Vray est que le subiect que ie desseigne traicter, est peu conuenable à vne missiue: car les lettres ont accoustumé d'estre escriptes de menuz & priuez affaires entre amis, & requierēt vn stile familier & populaire: là où, au contraire, les grandes & memorables choses attirent par leur splendeur vn genre d'escrire exquis, paré, enrichy de belles & longues liaisons & traynees de mots, & tissu d'un artifice elabouré, pour avec quelque grace dōner plaisir à ceulx qui les lisent, & apporter loz & recommandations à ceulx qui les mettent par escript. D'ailleurs ie me trouue maintenant tout decheu & appoury de ceste abondance de langage latin que ie soulois auoir. Car l'adresse & dexterité que vous auez autrefois tant louee

& estimee en moy, à sçauoir coucher & mettre par escript purement & elegamment en Latin les conceptions de mon esprit, s'est escoulee depuis le temps, qu'apres auoir passé par tant d'honestes degrez d'honneur en ma patrie, ie me suis en fin trouué reduict & cloué à ce barreau, où i'ay esté contrainct, & suis encores tous les iours, pour y apparoirre & m'acquitter de ma charge, cultiuer & labourer sans cesse le champ François, presque infertile & sterile, & abandonner du tout le plaisir des delicieuses & riches campagnes des doctes Grecz & Romains. Mais que sert m'excuser tant enuers vous pour le lāgage & stile de ceste Epistre, puis que ie ne me suis iamais iusques icy donné peine, & ne me chault gueres encores d'acquérir louange par ce moyen? Et que ce que i'en fais, est maintenant pour satisfaire à ceulx qui par toute raison humaine & diuine me doiuent & peuuent commander.

Pour commander donc à vous reciter l'histoire de la coniuration, telle que ie la sçay, ie vous diray, que le vingt deuxième du mois d'Aoust dernier, ayant esté le feu Sieur de Chastillon, en passant par la rue, de guet à pēd, attainct & blessé d'un coup de harquebuz, pres du chasteau du Louure: le Roy, qui ne pensoit rien moins qu'à cela, & s'exerçoit pour lors au jeu de la paulme avec plusieurs gentilshommes, & entre autres
avec

avec Teligny gendre dudit Sieur de Chastillon,
 fut fort troublé & esmeu d'entendre ceste nou-
 uelle, & en demeura grandemēt irrité & indigné,
 estimāt l'offense estre faicte à sa propre personne:
 veu le lieu où l'exces auoit esté cōmis, & attendu
 que ledict sieur de Chastillon, comme Admiral
 de France, estoit l'un des principaulx officiers de
 la couronne: & aussi préuoyant, que ce coup ne
 pourroit apporter que beaucoup de maux, &
 paraduanture estre occasion de renouueller les
 tumultes & guerre ciuile entre ses subiects: il cō-
 manda que celuy qui auoit donné le coup, lequel
 s'en fuyoit, fust en toute diligēce & vistesse pour-
 fuiuy, prins & ramené, si possible estoit, & à l'in-
 stant mesmes, sans en estre autrement requis, feit
 expedier vne commission adreesee à trois ou qua-
 tre personages de grande probité & integrité, &
 des premiers de son conseil & de nostre ordre,
 pour faire & parfaire le proces au delinquant, si
 apprehendé pouuoit estre, ou par contumace sui-
 uant l'ordre de la iustice. Leur enioignit de s'en-
 querir diligemēt & par le menu de toutes cho-
 ses, de l'entreprinse, de la source & origine d'i-
 celle, des autheurs, des complices consentans &
 coupables, leur faisant entēdre qu'il desiroit, que
 punition s'en ensuiuist si griesue & rigoureuse, que
 la memoire & l'exemple en demeurast pour ia-
 mais à toute la posterité. Ce mesme iour sur le

foir sa Maieſté, accompagné de la Royne sa mere & de messieurs ses freres, alla visiter l'Admiral gisant au liſt à cause de sa playe: parla à luy, & le cōsola fort humainement & doucement, avec toute demonstration d'une extreme douleur qu'il sentoit en son cœur de l'iniure qui auoit esté faicte à tous les deux: luy promet d'en faire faire le chastiment tel que le cas le meritoit: & si ce pendāt il se craignoit, & ne se tenoit assez assuré en maison priuee, luy offrit vne chambre dans le chasteau, ou des gardes, si mieux il aimoit en auoir. Brief ce Prince treshumain & tresbon n'oublia d'employer tout ce qui pouuoit seruir à luy adoucir & diminuer la douleur tant du corps que de l'esprit: autant en feirent la Royne mere, & les freres du Roy, Princes tresdoux & debonnaires.

L'Admiral, tout aussi tost qu'il fut blessé, & tous ceux de sa troupe, qui estoient en fort grand nombre, detestoient ouuertement & à haulte voix messieurs de Guyse, comme auteurs du faict: mais bruyans & murmurans plus bas les vns avec les autres, en soubçonnoient & mescroyoient la Royne mere, & Messieurs freres du Roy. D'ailleurs incontinent que la nouuelle du coup fut espandue par la ville, ceux qui faisoient profession de la religion nouuelle accoururent de toutes parts au logis dudit Admiral: chacun d'eux crye que c'est vn acte fort meschant & fort malheureux, comme

comme aussi il sembloit estre tel : tous fremissent & grincent les dents de cholere & de despit, & menassent tantost ceulx de Guyse à descouuert, tantost la Roynie mere, & les freres du Roy assez à clair, & quelquefois le repos & tranquillité de ce Royaume par le renouvellement d'une guerre civile. Vne partie mesme d'eulx s'en va au Roy, luy demande iustice & reparation de l'exces fait: mais c'est avec tant d'insolence, d'audace, & telles brauades, qu'il n'est possible de plus. Chose bien mal aisee à porter à un cueur si genereux que celui du Roy, & par trop indigne du deuoir d'un subiect enuers son Prince souuerain. L'Admiral mesmes, lors que le Roy le visita, comme nous auons dit cy dessus, apres tant d'honnestes & courtoises paroles, dont sa maiesté usa enuers luy, ne respondit iamais autre chose, sinon qu'on l'auoit rendu par ce coup de harquebuzes impotent des deux mains, mais qu'il auoit encores la teste saine & sauue, graces à Dieu : & que les choses qu'il auoit faictes iusques icy, il ne les auoit point faictes avec les mains, mais avec son esprit & entendement, qui luy restoit encores. Adioustant à cela, que si leurs maiestez ne l'eussent si longuement retenu en ceste ville, leur ayant plusieurs fois demandé son congé, ce meschef ne luy fust adueni, lequel il ne pouuoit attendre autre en celieu. Ceste perplexité & obscurité de langage

estoit assez interpretee & esclaircie par l'ardeur de ses yeux, par vn regard affreux & felon, par le son des paroles, & par toutes contenances qui decouuroient vn estrange embrasement de courroux & de haine, & vne profonde meditation de quelque hardy & estrange desseing. Toutefois pour tout cela le Roy treschrestien, la Roynes mere, & ses freres, ne se doutans de rien, & ne songeans à nul mal, pardonnoient à son ire & à sa douleur, qu'ils pensoient lors estre tres-iuste, & excusoient volontiers ce qu'ils oyoient, & par leur propre sentiment en cas pareil iugeoient equitalement & humainement de luy, & de tous les autres, & mesmes adioustoient leur indignation au courroux de luy & de tous les siens: de sorte qu'il eust esté mal aisé de iuger, lesquels sentoient plus vifvement l'offense, ou le Roy ou eux-mesmes, iusques à tant que le lendemain au soir on vint aduertir le Roy, que au logis del'Admiral on auoit faict vne coniuration & conspiration de tuer sa Maiesté, la Roynes mere, ses freres, & tous les Princes du sang, & de changer l'estat, ou transférer la Couronne ailleurs. Le Roy en demeura fort esbahy, sans toutefois le vouloir croire, sa bonne conscience luy tesmoignant assez la douceur, benignité & liberalité, dont il auoit tousiours vsé enuers ceste sorte d'hommes. Estant sur ce poinct entre l'esbahissement & la doubte, &

branlant

branlant d'une part & d'autre, celuy qui l'estoit venu aduertir luy assura qu'il auoit esté present à la cōiuration, & de peur d'estre accablé, si après auoir ouy le tout il refusoit de consentir & s'y accorder, il auoit promis, voire iuré avec les autres, mais du bout de la langue seulement, car quant au cœur & à la volonté, il ne iureroit iamais en chose où le salut de son Roy & des siens fust en quelque dāger. Que si on eust resolu de tuer ceux de Guyse seulement, ou bien si lon eust voulu espargner & mettre hors de l'entreprinse le Roy, la Royne sa mere, & Messieurs ses freres, desquels tous il confessoit auoir receu par plusieurs fois la vie & beaucoup de biens, il n'y auoit rien en ce mode qui l'eust peu induire & ramener à ce point de faillir de foy à ceux de sa religion gens de bien & craignans Dieu, & mesmes tresloyaux & tres-affectionnez seruiteurs du Roy, mais pour le present troublez & transportez de cholere au moyen de la faulse opinion qu'ils auoient conceuë, que le coup auoit esté donné, non sans l'intelligence de leurs maiestez : mais que les choses en estoient venues si auāt, que si le Roy ne pouruoyoit à soy, à la Royne sa mere, & à ses freres promptement, ils seroient tous tuez le lendemain à l'heure du soupper. Qu'il esperoit aussi que sa maiesté se contentant d'auoir euité le danger par le moyen de l'aduertissement, pardonneroit suiuant sa bonté

& clemence accoustumee, à ceux qui pechoient non par aucune meschanceté ou certaine malice, ains par cholere & par erreur: de laquelle esperance il prioit tres-affectueusement & tres-humblement le Roy qu'il ne fust point frustré, & l'en supplioit à ioinctes mains, la larme à l'œil.

Sa Maïesté l'ayant consolé & r'acoizé, il commanda à deduire au long & par le menu, quand, où, & par qui, la coniuration auoit esté faite, quelles personnes deuoient estre tuez, quel ordre tenu, quelles charges, & à quels chefs elles auoient esté departies, quelle resolution lon auoit prise en tout euenement, quoy que la chose succedast ou ne succedast point, & soit que la paix deust durer, ou que la guerre s'en deust ensuiuir avec les Catholiques.

La qualité du personnage qui parloit, faisoit adiouster beaucoup de foy à son dire, d'autât que le Roy l'auoit tousiours cogneu fort entier en la religion dont il faisoit profession, tresaffectionné à l'Admiral, & pareillement fort estimé & prisé de luy. Ioinct aussi que les indices des choses cotees & designees par les marques & circonstances, apportoiét vne grande lumiere de preuue à la verité du faict. Et commençoit ia quasi le Roy à s'en asseurer, quand voicy venir vn autre & second delateur de la mesme troupe des coniurez, & puis vn troisiéme bien tost apres, s'emercueillans les vns
des

des autres , chacun d'eux ayāt eu opinion qu'il seroit seul denonciateur de la conspiration. Tous trois interrogez sepárément , se rencontrerent de tous poincts en leurs aduertissements, le lieu & le temps de la cōiuration du tout semblable, mesmes personnes conspirantes & en pareil nombre, l'heure de l'execution qui se deuoit faire toute de mesme , pareille distribution & departement des charges entre les cōiurez , pareil nombre de ceux qui deuoient estre tuez , & de mesmes personnes & par mesmes mains , les resolutions prinſes en tout euenement toutes pareilles , rien de diuers ne dissemblable , toutes choses s'entrerespondans & accordans ensemble d'vne merueilleuse consonnance.

Le Roy voyant lors qu'il n'y auoit plus aucun lieu de douter, alla trouuer la Royne sa mere, s'assembla avec ses freres, & avec quelques vns des plus vieux & experimentez de son conseil , leur proposa le faict, cōme il venoit de luy estre dict: les pria d'ouir sur l'heure les trois delateurs qu'il auoit retenus. Ils sont ouys, ils exposent le tout en la presence du conseil, comme ils auoiēt denoncé vn peu auparauant au Roy. Soudainement vne frayeur grande saisit & empoigna toute l'assistance: mais la grandeur du peril, qui pendoit sur leurs testes, les excita à deliberer & à pouruoir de bonne heure à ce qu'il conuenoit faire. Et pourtant

apres auoir fait retirer les trois delateurs, on cōmença à deliberer & opiner en ceste sorte.

Les vieillars personnages de tresgrande experience sont d'aduis qu'és maladies extremes & tresdangereuses, il est loisible & besoing d'vser de remede prompt, extreme & hazardeux: qu'il falloit incontinent aller au deuant de la coniuration, la preuenir, & destourner promptement sur la teste des cōspirateurs l'encombrier, & le meschef qu'ils machinoient contre le Roy & les siens, & que sans plus tarder, sur l'heure mesme il falloit mettre la main aux armes, & se depescher d'eux.

Le Roy, la Royne sa mere, & messieurs ses freres disoient, qu'vne telle execution soudaine, rigoureuse & extraordinaire, estoit voirement digne de l'audace & meschanceté de ces malheureux, mais qu'il leur sembloit plus equitable & plus digne de la clemence, dont le Roy auoit tousiours vsé en leur endroit, de faire plus amplement informer & proceder contre eux, & ce pendant faire prendre prisonniers ceux que lon disoit auoir coniuré.

Alors les anciens remonstrent qu'il fault icy commencer par l'execution, qu'en vne chose si euidente, & vn peril si grand & si proche, il seroit bien dangereux d'attendre vne si longue trainee d'informatiōs, de delaiz & de procedures, qu'on auoit affaire à des hommes trop audacieux, & en trop

trop grãd nombre pour cuider executer des princesses de corps, que le Roy estoit pressé du temps, que les choses de plus grãde consequence se tournent bien souuent à moins de rien, & pendent cōme à vn fillet, & que si dans la nuit prochaine lon ne venoit à bout des conspirateurs, c'estoit faict du Roy & de tout le Royaume.

A cela respond sa Maiefté, qu'il n'auoit point seulement à conseruer sa vie, mais aussi son bon nom. Que si lon faisoit informer plus auant, & que les coniurez estans prins prisonniers fussent conuaincus, il auroit pourueu aux deux. Car que diroient les nations estranges, disoit il, sinon, que pour vanger les vieilles iniures, on auroit exquis & affecté ce pretexte de coniuration? Il adioustoit à cela, que le Royaume luy auoit esté tellement laissé par ses ancestres, & aussi que des son ieune aage la Royne sa mere l'auoit instruit & enseigné par sa prudence, & accoustumé aux loix de la iustice de telle sorte, qu'il ne voudroit iamais condamner personne sans l'auoir ouy, ne permettre que celuy fust tué qui n'auroit esté cōdamné, & feroit grande conscience de souffrir alendroiēt du moindre de ses subiects, qu'il fust puny comme coupable de crime sans luy auoir faict faire & parfaire son procez. Qu'il aimoit mieux encourir le danger de sa vie que d'entamer sa reputation, ou blesser son ame: mais qu'il espe-

roit, puis que la chose estoit ia descouuerte, que tous ces dangers pourroient estre euités sans tuer personne.

Laissez, ie vous supplie, ceste esperâce, Sire par trop doulx & clemēt, dit l'un de ses vieillards : car tels cōiurez pourrōt paraduātūre bien estre tuez, si lon y va incontīnēt, mais de les prédre il est impossible, si ce n'est vn ou deux, & encores non sans meurtre & tuerie, que vous voulez neantmoins euitier. Et quant bien vous vous sauueriez de leurs aguets & embusches, pour le moins ne pourrez vous eschapper vne quatriesme guerre ciuile : & alors ferons nous cōtraincts de voir pour la quatriesme fois les pilleries, brulemēts, ruines, degasts & embrasemens, dont vos Gaules fument encores, & en sont miserables. Et en voulant par trop espargner voz ennemis certains & iurez, vous aurez, contre vostre vouloir & intention, esté cruel enuers la patrie, & prodigue de vos bōs & loyaux subiects & seruiteurs. C'est ce blasme, Sire, d'auoir comme trahy le pais, c'est ceste charge & remors de cōscience, qu'il fault craindre & auoir en horreur. Car au reste tout homme de bien & equitable approuuera vn acte si beau & si necessaire, lequel nous sçauons vous estre loisible par toute raison de droit diuin & humain : & n'y auroit pas faute d'exemple que nous pourrions vous alleguer, si la matiere requeroit vn long discours,
plus tost

plustost qu'une prompte execution. Et pourtant, Sire, sauuez vous, sauuez la Royne vostre mere, sauuez nous tous, sauuez le pais.

Le Roy esmeu de ces propos, apres auoir demeuré quelque temps, comme fiché en vne profonde pensée, leur dit en fin, avec vne voix & contenance triste: puisque donc il vous semble estre ainsi le plus expedient & cōuenable aux loix diuines & humaines, ie consens qu'il se face. Dieu me soit tesmoing & iuge que ce que i'en entreprends est à mon grand regret, & pour me garder d'estre surpris, & non pour autrui surprendre. Lors apres auoir fait appeller ses plus confidés, & ceulx qui luy sembloiet les plus propres pour executer l'affaire, il leur donna le mot & le commandement, avec charge expresse de ne toucher qu'aux conspirateurs, desquels les noms auoient esté deferez & mis par escript. Sur tout, d'empescher qu'il n'y eust sedition, tumulte, ny emotion populaire, à fin que les innocents n'endurassent pour les coupables.

Comme ia ils partoient pour aller executer le commandemēt, il les rappelle vne fois, deux fois, trois fois. Et ayant par trois fois reuocqué, & autant de fois reiteré le mandement, il ne luy estoit possible de persister en la resolution qu'il auoit prinse par l'aduis de son Conseil, iusques à ce qu'il fut comme tanzé par tous les Seigneurs du Con-

feil, qui estoient au pres de luy.

Ainsi donc fut faicte l'exécution sur le matin du iour & feste Sainct Barthelemy: mais, comme il aduient ordinairement en telle chose, quelques vns des conspirateurs eschapperent, & quelques autres qui n'auoient point coniuré, y furent tuez. Et mesmes la commune de Paris entendant que lon auoit voulu attenter à la personne du Roy, & conspiré de le tuer, & apres l'accager la ville, irritée du peril de son Prince & du sien propre, portée aussi de quelque haine contre la religion nouvelle, se rua furieusement sur plusieurs, qu'elle pensoit estre aussi bien associez à l'Admiral en la conspiration, comme ils luy estoient compaignons & partisans en sa religion. Ce mal s'estendit encores plus oultre en quelques villes de la France: de sorte que contre la volonté & l'Edict du Roy, sous tel pretexte plusieurs y furent tuez.

Il n'y a personne qui en ait esté si marry ne indigné, que sa Maiesté: mais, comme ie disois au commencement de ceste lettre, Seigneur Eluide, telle est la nature de la populasse, que ou bien elle se tient quoye oysiuement, ou bien se mutinant d'une extreme violéce se desborde à toute cruauté, & ne garde moyen ny mesure quelconque. Oultre ce, il n'y a iamais faute parmy les hommes, en quelque part du monde que ce soit, de haines, enuies, noises, querelles, & proces. De tous les
que

quels maux nostre France, à raison des trois precedents troubles, regorgeoit de toutes parts. Et partant tandis que les vns pensent à reuanger leur Prince, les autres à vanger leurs iniures particulieres, les autres à saouler leurs haines, les autres à piller & butiner, on ne se souuient point de la volonté du Roy, on n'oit point ses Ediëts, on luy fait naistre infinies occasions de douleur, regretz & facherie: car il ne fut en sa vie en telle peine, & ne porta oncques rien si impatiemment, que d'entendre la mort de ceux qu'il desiroit conseruer en toute sorte.

Au reste, sa Maiesté fait de sa part, en cest endroit, tout ce que pourroit faire vn bon Roy aimant ses subiects. Car à peine estoit il la premiere heure du iour, que nous comptons sept heures, quand sa Maiesté fait crier, que lon ne tuaist plus, non pas mesmes des coniurez: mais si de là en auant on trouuoit quelques complices de la coniuration, que lon les menast prisonniers. Commanda que lon meist des hommes armez & des corps de garde par les places & carrefours de Paris, & d'autres feissent la ronde par toute la ville, pour empescher que lon ne tuaist & pillast. Le cry fut depuis reiteré par chacun iour, & à tel iour plusieurs fois. Il entra le mercredy ensuiuant en sa Court de Parlement, & y tenant son liët de iustice fait prononcer vn arrest cõtre les violēces

& saccagemens qui se faisoient, avec vn reglemēt aux magistrats inferieurs, comme ils deuoient se comporter à reprimer les insolences & mutineries. A l'issue de là on dressa des potences par toute la ville pour la terreur & supplice des seditieux. On enuoya des Edicts par toutes les Prouinces aux Gouverneurs & Lieutenans, par lesquels sa Maiesté defendoit tres-estroitement tuer, sur peine de la hart: Enioignant ausdicts Gouverneurs & Lieutenans, de faire proceder seuerement & rigoreusement contre ceux qui, pour quelque pre-texte que ce fust, entreprendroient licentieusement, & sans autorité publique, mettre la main sur autrui. Il me semble que le Roy n'eust sceu faire autre chose. Mais si ailleurs l'exécution, & le chastiment s'en est ensuiuy contre ceux qui ont contreuenue, tel que l'Edict le requeroit, ie ne vous en sçauois que dire. Car quant en ceste ville, lon y a fait ce que lon a deu selon le temps & circonstances d'iceluy, lesquelles ne sont à negliger en telles choses, cōme il me sera tousiours bien aisé de persuader à vous & à tous ceux qui ont cognoissance & experience des affaires du monde.

Mais en ce que ie vous diray maintenāt nostre Prince a surpassé toute mesure de clemence. C'est qu'en punissant vne conspiration, la plus maudicte qui fut oncques faicte depuis que le monde est

est monde , & en vne grande faute de finances prouenue mefmement à l'occasion des coniu- rez : toutefois sa Maiefté vſant d'une bonté nom- pareille, a laiffé les biens des meurtris à leurs en- fans & heritiers . Et encores que par le droict de leze Maiefté & de perduellion , il peut leur oſter non ſeulement les paternels , mais auſſi tous au- tres , avec la nobleſſe , & l'eſperance de tous hon- neurs & bonnes fortunes à iamais : toutefois ſa Maiefté leur oſtroyant iouir des biens de leurs peres, les a reſeruez à toutes choſes hautes & gran- des , fils en deuiennent dignes , & donnent cy apres occaſion à ſa Maieſté de les y eſleuer. Voire, qui plus eſt, de tous les coniuérateurs on n'a con- damné la memoire que d'un ſeul.

Seulement en l'endroiect du feu Admiral com- me chef de la coniuration & principal occaſion d'icelle , ſa Maieſté a voulu que par la Court de Parlement de Paris fuſt procedé ſelon la forme & rigueur des loix , non pour autre raiſon , ſinon à fin que par le iugement d'un Senat ſi ſainct & ſi graue, il apparuſt à tous les mortels, de la coniura- tion qui auoit eſté faiçte contre ſa vie & contre ſon eſtat. Car pour le regard de la peine de la con- ſpiration, il n'en a point voulu d'autre, que telle & ſi grande que le peril & la neceſſité d'un prompt remede le requeroit. Voila quant au Roy.

Quant à la Royne ſa mere, ie ne vous ſçauois

representer par ceste lettre assez dignemēt sa prudence, & son bon conseil à appaiser & reprimer les seditieux, ny son grand soing & sollicitude à conseruer vn bon nombre d'hommes qui estoiet en extreme danger, & qui sans doute en ceste fureur populaire feussent morts, sans son aide & bonté. Iamais personne ne fut en telle perplexité & angoisse, comme fut en ceste miserable iournee ceste vertueuse Roynes, qui en sagesse & clemence surpassa toutes autres. Et vous puis dire, que nous luy auons veu prédre en cest affaire vne peine incroyable, & plus grande si vous voulez que toutes celles que si souuent & si courageusement elle a supportees pour le soustenement, seuereté, repos, & grandeur de la couronne de France. Et consideroit ladicte Dame, comme ie croy, en cest acte, qu'en vain elle auoit en temps de guerre tousiours regardé à la paix, si la paix deuoit ruiner ou les vns ou les autres, & si vne seule iournee deuoit abolir & effacer toutes les louanges qu'elle auoit acquises pour auoir tant de fois accordé & pacifié les tumultes, & réüny les subiects du Roy en vne obeissance.

Que vous diray-ie maintenant de ce Prince Heroïque, Monseigneur le duc d'Anjou frere du Roy, avec quelle vertu & seuerité il s'opposa à la fureur & cruauté de la commune, avec quelle clemence & benignité il secourut ceux qui estoient
en

en peine & en danger? Il nous auoit desia tout le long de son aage donné preuues & tesmoignages en toute sorte d'un bon Prince genereux, magnanime, iuste, clemēt, liberal & magnifique: il auoit mis fin aux deux dernieres guerres ciuiles, par sa vertu, par son autorité & par son bon heur, luy que nous pouuons vrayement dire auoir esté le salut certain du pais, & l'vnique appuy & resource de toute la France en la commune affliction. Il auoit encores le premier & par dessus tous les autres gardé la paix que le Roy auoit accordée à ses subiects, & festoit luy mesmes rendu obeissant à l'Edict de Pacification, plus que nul autre de tous les François: & comme parauant il auoit esté le fouldre de la guerre, ainsi maintenant il estoit l'entretien & le neu de la paix: mais en ce dernier tumulte de Paris il nous a en oultre fait voir, qu'il vouloit & pouuoit en temps de paix preseruer de la force & violence, ceulx qu'en guerre il auoit dontez & vaincuz par les armes.

Si ie voulois aussi vous parler de Monseigneur le Duc d'Alençon frere du Roy, Prince tresbon & tresclement, & de tous les autres Seigneurs & personnes de marque & de qualité, ce ne seroit iamais fait, & ceste lettre deuiendroit vn gros volume. Je vous diray seulement en general, que leur prudence, leur bon Conseil, leur diligence, & leur zele s'est apparu & faict voir en publicq, en

satisfaisant au desir & volonté du Roy : & en priué ils ont fait cognoistre leur benignité & humanité en tout ce qu'ils ont peu. Car les palais des Princes & grands seigneurs, & les maisons des nobles & personnes d'honneur, furent ouuertes à ceulx qui s'y retiroient comme en lieu de franchise & de seureté, où ils furent reçeus, & avec toute gracieuseté & courtoisie traittez, & tenuz fort liberalement. Il n'y a catholique de tant soit peu d'honneste lieu & condition, qui ne se puisse vanter, ou qui ne se reiouisse d'en auoir retiré & conserué quelqu'un : aussi plusieurs gaignez par ceste bonté & charité se sont tournez de nostre part, & remis au bon chemin, dont ils festoiēt foruoyez. Tellement que ceulx qui ont esté garentis, aymēt & respectent leurs patrons & conseruateurs, & ceulx qui les ont preseruez cherissent ceulx qu'ils ont sauuez, comme leurs clients & creatures, s'entretenans tous d'un amour, non seulement mutuel & reciproque, mais aussi parfait & accomply. Vous asseurant que depuis le miserable & maudit schisme & dissention de religion, iamais les cueurs des François ne furent plus ioincts & vniz qu'ils sont à present. De sorte qu'il semble que ceste sedition par laquelle nous deuoit aduenir un si grand bien, & une si grande concorde, encores qu'elle ait esté fort terrible & espouuanteable, autant que nulle autre dont nous ayons memoire,

moire, deuoit route fois, par maniere de dire, estre
desiree & souhaittee de nous.

Toutes ces choses, Seigneur Eluide, en la maniere & façon que ie vous viens de conter ont esté faictes. Si en vos quartiers ou ailleurs quelque part que ce soit on a rapporté ou escript chose contraire, ie vous supplie penser, que cela est faulxement & malicieusement supposé & controuué par les ennemis de sa Maiesté & de cest estat. De ma part ie serois fort marry de sciément vous tromper, comme aussi ie m'asseure que n'avez point ceste opinion de moy, m'ayant tousiours cogneu, en eschange de plusieurs imperfections qui sont en moy, pour le moins cupide & desireux de la verité.

Or quant aux choses que ie vous ay escriptes auoir esté faictes par le Roy & par les principaux de pardeça, non seulement vous en tirerez les conséquences qu'il faut pour vous mesmes, ains i'espere que vous apprendrez aux autres ce qu'ils en doiuent estimer & iuger, de sorte qu'il ne seroit ia besoing de plus rien adiouster icy pour l'instruction de vostre intelligence & bon iugemēt. Mais d'autāt qu'il pourra aduenir que ceste mienne lettre tombera és mains de ceux, ausquels route fois vostre voix sage & equitable ne paruiendra point, il m'a semblé que ie deuois poursuiure la chose vn peu plus amplement, & preuenir par

mon stile ceux qui ne pourrōt apprendre de vous quel iugement ils en doiuent faire.

Qui a il donc en tout cecy qui à bon droit puisse estre reprins? ou, pour mieux dire, qui ne merite louange? Car en premier lieu, qu'il y ait eu coniuration, nul (tant impudent ou meschant soit il) sinon qu'il soit du nombre des coniurateurs mesmes, ne l'ozeroit nier, singulierement apres le iugement & arrest de la Court sur ce donné: Car outre les trois delateurs de la coniuration qui auoient esté presents, plusieurs des cōspirateurs lors qu'on les fraploit s'escrierēt, que par vn iuste iugement de Dieu ils enduroient eux mesmes ce qu'ils auoient machiné contre autrui. Quelques vns aussi, prins prisonniers, confesserent en iustice vne partie des choses qui auoient esté reuelees par les denonciateurs, & tout ce qui auoit esté confessé par ceux cy, & reuelé par ceux la, a depuis esté enquis, veu, verifié, esclaircy, & mis à iour par la Court de Parlement, comme il est amplement contenu és actes & registres d'icelle.

Que si nous ne tenions conuaincue, & comme attachee & garrottee la coniuration par les indices, par les confessions des coupables, par la veüe & par la presence des choses, & par le iugement & arrest de la Court, & qu'il y fallust venir par des soupçons & coniectures, vous semble il qu'il y eust grand affaire de persuader au monde, que le
feu

feu Admiral, & quelques vns des siës, eussent esté tels d'auoir conspiré? eux qui en la lumiere de la France, & aux yeux de toutes les nations, ont par tant de fois assailly le Roy, premierement par aguets, & puis à guerre ouuerte, si guerre se peult nommer ce que lon entreprend contre son prince naturel.

Or ie vous prie, quelle chose leur deffailloit il, laquelle ils eussent eüe nous croirions qu'ils auroient coniué? à vostre aduis auoient ils faute d'audace, eux qui par l'espace de treize ans, & depuis les tumultes d'Amboise, par toutes sortes de meurtres, pilleries, brulemés & ruines, estoient deuenus si audacieux & insolents, que les choses qui d'elles mesmes sont mauuaises, perilleuses & capitales, leur sembloient legeres faciles, seures, brief des petits ieux, & passe-temps? Ils ne portoient plus aucune reuerence au Prince, nul respect aux loix: le bien, le mal, tout leur estoit vn. D'auantage ceste audace acquise par vne si longue accoustumance estoit pour lors augmentee, effarouchée, & elancée à toute meschanceté par la douleur & cholere, de ce que leur chef principal auoit esté blessé, par la cholere, di-ie, qui est la plus puissante & la plus dangereuse perturbation de l'ame: par laquelle les hommes modestes mesmes, & autrement gens de bien, sont quelquefois poussez à cōmettre des choses atroces & impies.

Mais passons oultre au reste . Quelle esperance leur manquoit il ? n'esperoient ils point venir à bout de leur damnee entreprise , veu que tous les chefs, & les plus audacieux de la faction, estoient pour lors à la Court ? ce que ie ne cuide point estre adueni auparauant : Le Roy au contraire desarmé, despourueu, & ne pensant à autre chose qu'à honorer, le plus qu'il luy seroit possible, par des magnificences & sumptuositez Royales, les nopces de sa tres-aimée & tres-vertueuse Sœur.

Ouy mais, direz vous, estoit il possible qu'ils eussent esperé de pouuoir retenir vn tel royaume si meschamment & si malheureusement occupé? L'esperance ne leur manquoit icy non plus qu'au reste. Car puis qu'ils auoient tant de fois soustenu tous les Catholiques ensemble és guerres passées, ils ne faisoient aucun doubte, qu'apres auoir osté l'empeschement des Rois & des Princes, le menu peuple desarmé & sans teste ne receust aisément & tout incontinent le ioug. Et puis ce beau lustre de bien publicq, & ces belles promesses de soullager le peuple par vn rabais de tailles & subsides, qu'ils meirent en auant lors qu'ils commencerent les seconds troubles, n'eussent point esté oubliées, pour amorcer & appaster les bônes gens : d'auantage ils scauoient que les Rois & Princes Catholiques estrangers, qui eussent voulu & peu van-
ger vne meschanceté si execrable & detestable,
estoient

estoyent ou trop loing de nous, ou empeschez à la guerre contre le Turcq, ou aussi à la leur propre. Quant aux Allemans, & Anglois, comme par cy deuant ils leur auoient imposé par leurs menfonges plusieurs fois, aussi esperoient ils que cy apres ils les paistroyent & contenteroient de bayes. Mais ie vous diray bien plus, Eluide, que si d'aduenture ils ne fussent venus à bout de leur entreprise, ils n'auoient dequoy craindre la peine, qui deterre quelquefois les meschans de faire le mal qu'ils voudroient bien, & fasseuroient d'obtenir grace & impunité, qui a esté tousiours vn grand allechement & vne tresdouce & friande amorce à toute meschanceté: attendu qu'apres auoir tant de fois coniuéré, & pour festre tant de fois reuoltez, ils n'auoient oncques esté punis: ains, au contraire, les aguets & coniurations qui ont accoustumé d'estre capitales & pernicieuses à tous autres, estoient en culx recompensees & honnorees.

Or à tels coniuérateurs, que leur deuoit on faire autre chose que ce qu'ils ont enduré? voire mais, dira on, il estoit raisonnable leur faire & parfaire leurs proces par vne Court de Parlement ou par Iuges à ce commis & deputez, & apres leur faire porter la peine qu'ils meritoient.

Telle estoit voirement l'opinion du Roy, de la Royne sa mere, & de Messieurs ses freres, comme

nous auons dict cy dessus, mais en fin le meilleur & le plus seur aduis du Conseil fut suiuy, de peur que tandis qu'on eust appresté & instruit vn proces, le Roy se fust trouué surpris, & enuelopé dans les retz de la coniuration.

Ainsi auons nous leu, qu'autre fois le Senat Romain fut d'opinion qu'on n'attendist point la confection du proces en la personne de Lentulus, Cethegus, & leurs complices attaincts de semblable crime, ains conseilla au Consul qui pour lors estoit, de les faire incontinent mourir, & sans delay. Quoy donc? ce qui a esté loisible à vn Consul en vne republique libre, ne le fera il point à vn Roy en son Royaume? Mais il n'est ia besoing d'alleguer exemple, là où le droict est certain & euidét. Car nous sommes enseignez par le droict Romain, que vous sçaez tresbien, seigneur Eluide, nō seulement par le nostre François, qu'en matiere de crimes & de procedures, on n'vse point de la commune & ordinaire façon des proces criminels alencōtre de ceulx, à la prompte punition desquels la republique a interest, comme sont les auteurs des seditions, les voleurs insignes, les chefs de faction. Et que en vne esmeute perilleuse, & en vn trouble sanglant, ou autre iuste cause qui ne reçoit point de delay ny de surseance, il est mesme loisible aux magistrats inferieurs, desquels il y a ordinairement appel, punir, & puis escrire au Prince

Prince, pour preuenir le danger. Et quand bien les loix n'en feroient point de mention, toute fois en vn si extreme danger il falloit considerer, non ce que la subtilité du droit portoit, mais ce qui estoit plus expedient. Car comme disoit iadis vn Romain, les loix n'ont point de voix parmy les armes, & n'vsent point de commandement pour se faire attédre. Veu que celuy qui en voudroit vsfer en telle sorte, se trouueroit plustost auoir receu vne peine iniustemēt, que de pouuoir la faire endurer à qui l'auroit meritee: Ioinct que lors que nostre vie est tombee en quelque embusche entre les mains des brigans, tous moyens de nous sauuer sont tenuz pour bons, legitimes & honnestes.

Maintenant il nous fault respondre en peu de paroles à certains propos faulx, que lon seme par tout, de ie ne sçay quelle hayne du Roy enuers le feu Admiral, & de sa longue dissimulation. Ie dis donc premieremēt, que là où la conspiration est toute certaine & manifeste, il n'est point besoing de s'enquerir plus auant de telle haine: Car quand bien cela seroit vray, que l'Admiral auroit esté odieux au Roy, la coniuration n'en deuroit point estre pourtant moins punie en luy. Et sil y auoit lieu de doubter de la conspiration, elle seroit d'autant plus vray semblable, que lon croira tousiours plustost que lon a coniuré contre celuy duquel lon est hay, que non pas contre vn duquel

on est aimé. D'auantage si le Roy haioit l'Admiral, c'est vne grande louange à sa maiesté de n'auoir point seullement conserué & gardé sans aucune offense iusques à la conspiration, celuy qu'il pouuoit perdre & ruiner, ains de l'auoir accreu & honoré de plusieurs grāds dons & bien-faicts. Mais la verité est telle, que depuis que le Roy par son Edict de pacification eut remis en sa bonne grace ceulx de la religion nouuelle, iamaïs lon ne s'est apperçeu qu'il eust aucune haine alencontre de pas vn d'iceulx. Or de penser que vn ieune Roy, qui des son enfance a tousiours esté trouué franc & ouuert, ait peu tromper tant d'hommes rusez, si long temps, en vne telle familiarité & frequentation, en vne si grande varieté de propos & de negoces, c'est à faire à personne peu versée & experimentee en la nature des choses & en la vie humaine. Vn vieil routier sexagenaire le plus cauteleux & rusé du monde, fust-il vn Sinon, ou vn Vlysses, ne pourroit suffire à la moindre partie d'une si grāde dissimulation pour vn bien peu de temps seullement: & vn si grand embrasemēt de haine, comme il faudroit que cestuy eust esté, romproit vne poictrine d'acier, ou bien la reduiroit en cendre, plustost que d'estre tenu si long temps enclos, sans ietter hors quelque flamme ou fumee. Mais si en cest aage de ieunesse pouuoit tomber vne telle extre-

mité

mité & vn si grand excès de faintise & de dissimulation, ce qui n'est point possible : toutefois il faudroit auoir vn esprit que la nature mesme eust expressément formé, dressé & disposé à tout dol & malice, & qu'il eust esté renforcé par vne infinité d'exquis artifices à toute sorte de fraude, & par vne continuelle accoustumance de feindre, tromper & deceuoir. Car nul de nous ne se peult former & façonner tout à vn coup, soit en bien ou en mal, & ne peult la vie de pas vn de nous se changer soudainement, ne nostre nature estre transformée & renuersée d'vn contraire à autre, sans vne fort longue accoustumance. Or est il, que le Roy treschrestien est de sa nature franc, simple & rond, voire par vne certaine chaleur & cholere genereuse plus ouuert, qu'il ne seroit possible besoing : & s'est tellement accoustumé toute sa vie, qu'il descouure son affection librement & promptement, & ne pourroit en chose du mode cacher l'inclination de sa volonté, qui se descouure & manifeste d'elle mesme.

Mais pourautant que ces faiseurs & semeurs de bruits monstrent auoir tant de désir & enuie d'ouir parler de la haine, il les en fault saouler, & leur dire voirement, que le Roy auoit plusieurs grandes & iustes occasions de hair l'Admiral, fil l'eust voulu faire, & que sa clemence & bonté ne l'en eust empesché. Car, pour n'en rien deguïser,

l'Admiral auoit desia par quatre fois cōiuré cōtre le Roy, & cōtre l'estat de ce Royaume: il auoit par trois fois ouuert la Frāce aux estrāgers: il auoit separé du Roy vne grāde partie de ses subiects, & le Roy d'auec eulx, & les subiects d'entre eulx mesmes: il auoit difformé tout ce Royaume par vne infinité de ruines, & demolitiōs, & couuert de feu & de s̄ag. Il festoit delecté à saccager & ruiner les Eglises, & à tuër les presbtres, apres les auoir cruellemēt tourmētez. Il auoit honteusemēt profané la religion des sepulchres, & iecté les corps des Roys & Princes aux chiens & oyseaux en la campagne. Brief violant & peruertissant tout droit diuin & humain, il auoit cōmis beaucoup de crimes, chascun desquels le rēdoit detestable, odieux & digne de mille supplices. Voila quāt aux trois troubles. En la paix cōment festoit il cōporté? nous auons bien auéré, qu'il auoit tousiours cōtinué ses anciennes intelligēces & ligues avec les estrangers, cōtre ce qu'il auoit promis & iuré par la derniere pacificatiō, & en auoit pratiqué de toutes nouuelles. Il auoit dressé de nouveau des enrollemens & leuees d'hōmes par toute la France: de trois en trois mois il se faisoit apporter des rolles tāt de gens de pied que de cheual, pour auoir tousiours en main cōbien de forces il pouuoit tirer de chacune province, voire de chacune Eglise qu'ils appelloient. Il auoit ses tailles, ses thresoriers generaulx & particuliers

culiers & son fisc. Tant qu'il eust vescu la Frâce ne pouuoit esperer la paix ny avec soy ny avec l'estranger, ny rien de bon: mesme, ie diray, ne pouuoit cōsister. C'est Dieu qui pour le salut de ce Royaume nous en a deliuré, & non la main & force des hōmes: ce sera Dieu aussi, comme i'espere, qui felicitera l'aduenir, & restituera à la Frâce affligée par tant de guerres & seditiōs (desquelles les autheurs sont maintenāt estaincts) sa premiere tranquillité, avec l'authorité des loix, des magistrats, & des iugemens: rappellera la foy, la iustice, & la pieté: réplira le nōbre de la ieunesse diminué par la violēce des guerres, repeuplāt les Gaules par vne fecōde propagation de lignee: remettra sus les estudes de sciēce & des arts vertueux & honnestes, qui gisent abbatuz & terrassez par la violēce des seditiōs: rédra au soldat la discipline militaire, aux artisans leur industrie, aux laboureurs le doulx & non ingrat labour de la terre, au marchand la liberté & moié de traffiquer en toute seureté: & à ce Royaume, qui auparauāt les furieuses dissentiōs pour le faiēt de la religion estoit tresflorissant, ramenera sa dignité, sa reputation & amplitudē premiere.

Et pourtant, Seigneur Eluide, en cest endroit i'ay à prier tous ceulx, és mains desquels la presente pourra tomber, de ne nous enuier point ce bénéfice de Dieu, de n'estre point marris du salut & conseruation de nostre Roy, de se resiouir avec

nous de la deliurance de nostre patrie, de ne calomnier point vn acte si beau & si necessaire, de ne nourrir point aussi les faulx bruiçts des calomniateurs par leur credulité, & sur tout de ne dire & estimer cruel celuy, qui par son indulgence enuers tous ses subiects, & par sa clemence a surpassé tous ses predecesseurs Roys doux & benins. Apres auoir tant de fois vaincu ceulx par lesquels il auoit esté assiegé, assailly & trauaillé en toute sorte, il s'est voulu vaincre soy-mesme d'une victoire plus difficile, plus noble, & digne d'un plus grand & plus magnifique triomphe, admortissant & ensepuelissant toutes les iniures passees par vne oubliance volontaire : & non seulement faisant grace à ceulx qui auoient si grieuement failly, mais aussi les remettant en leurs biens, & les restituant en leurs premieres dignitez. Ceulx qui ont iadis peu faire telles choses, ont tousiours esté par les anciens sages, non seulement egalez aux plus excellents hommes, mais ont esté par dessus toute mortalité reputez semblables à Dieu mesme. Et maintenant ceste vertu singuliere & diuine, qui ne pourra iamais assez dignement estre celebree & louee par toutes les histoires & poëmes qu'on en scauroit escrire, sera fraudée non seulement de sa louange meritee, mais (ô Dieu quelle impieté!) lon l'estimera vne ruse, vne cautelle, vne fraude & vne malice. Ne voila point

point vne extreme ingratitude? Ne pouuõs nous pas bien dire, que nous sommes en vn temps malheureux & ennemy des plus excellentes vertus? Hé que miserables sont pour le iourd'huy les vertueux, fils s'attendent aucunement à l'opinion & au gré des hommes, & fils n'estiment la vertu mesme estre le seul loyer & guerdon qu'ils en recepuront!

Auant que ceste conspiration eust esté descouuerte & punie, le Roy treschrestien estoit à ces personnes là seul clement & loyal, seul ouuert & rond, sans aucun fard ne dissimulation, seul leur foulas, leur appuy & defense, seul leur amour & delices, seul leur tout. C'est icy vne tache & blafme de ce siecle, que de n'oublier pas seulement les beaux faiçts des hommes excellents qui ont bien merité du genre humain, mais encores en soupçonner de meschans, non ouïs, & qui ne peuuent estre par la nature, ny par le cours & raison de la vie humaine, & sur tout de s'attaquer à la bõne renommee des meilleurs Rois & les plus hault-louez, les despouiller de leurs vrayes vertus & louanges, & les blasonner & diffamer de faulx faiçts & crimes du tout impossibles. Il n'y a vertu pour le iour dhuý qui soit seure, ny maiesté qui soit sainte, ny dignité qui ne soit violee. Ne verrons nous iamais, que pour tant de merites, & par tant de iugemens & louanges des hommes, les personnages

excellents en vertus , & les bons Roys paruiénent à yne forteresse comme sacree & saincte, où leur vertu & maiesté puisse s'arrester & reposer, sinon avec tel honneur & veneration qu'il appartient, pour le moins avec toute seureté? Que si telle chose ne se peult obtenir des hommes malins, ou legers, ou ignorás, pour le moins espere-ie, qu'enuers les gens de bien, & qui ont quelque cognoissance de bien & d'honneur, & principalement enuers tous les Rois, Princes & potentats, la bonne renommee & l'amitié de nostre Roy, demeurera ferme, stable & permanēte à iamais. Lesquels Rois & potentats en leur grande prosperité ferōt chose conuenable à leur sagesse & prudence, de considerer combien aisément & en peu de temps se change & tourne ceste vie, cōbien est prompte & soudaine la volubilité de fortune, combien grande la varieté des accidents & inconuenients humains: combien il y a bien souuent parmy les subiects, non seulement de legereté, inconstance, & temerité, mais aussi de contumace infidelité, & trahison. Que la vicissitude des choses humaines pourroit apporter tel cas & tel inconuenient (ce que Dieu ne vueille) qu'ils pourroient vn iour desirer & requerir, non seulement l'equité du Roy treschrestien, pour iuger & estimer equitablemēt de leur seuerité, mais aussi son aide & secours pour repoulser quelque peril & semblable danger

ger. Il n'y eut oncques siecle si diffamé de tant de seditions, ny de tant de rebellions & conspirations alencontre des Princes comme cestuy auquel nous viuons. Que si ceste iniquité de temps & calamité fatale de ce siecle est encores aidee & fortifiee par des enuies, simuletez, & mesmes par des haines des Rois & Princes entre eux, commét fera il possible, que l'authorité & la maiesté des Princes se maintienne, ou que par vne cheute & precipice elle ne soit incontinent renuersee par terre?

Mais tous peuples à quiconque ce soit qu'ils obeissēt, & par quelque forme & maniere de police qu'ils soient regis & gouuernez, feront bien & sagement de penser & considerer qu'il n'y a rien si populaire, ny rien si salutaire à ceste vie cōmune, que la paix, le repos & la tranquillité. Desquels biens ils ne peuuent iouir, s'ils n'obeissent cōme il appartient: aussi qu'il n'y a rien si pernicieux à vn peuple, que les seditiōs, rebellions & desobeissances, ny rien plus malheureux & abominable que des fauteurs de seditions, & par ce moyen nourriciers de toutes sortes de maux & miseres. Que les emotions ciuilles & populaires sont bien tousiours ennuieuses & fascheuses aux Princes, toutesfois peu souuent funestes ou ruineuses: mais au pauvre peuple, tousiours & tout incontinent miserables & calamiteuses. Le pauvre peuple est

le premier pillé, accablé, ruiné, deschiré, brulé, & qui est le pis & la plus grande misere que i'y voye, il pense endurer toutes ces pauuretez & miseres pour sacquerir quelque bien, ou pour auoir allégeance de quelque mal, mais en effect & à la verité il endure le tout, & se rend miserable, pour, sans qu'il s'en apperçoie, acquerir impunité de crimes & meschancetez ou accroissements de biens & d'honneurs à ces autheurs de troubles & de seditions, & à ceux qui l'esmeuent & l'incitent, le trompēt, deçoient & ruinent, tant est ce pauvre peuple par trop credule & simple.

Le feu Admiral a donné beaucoup de peine & de fascherie au Roy treschrestien, à la Roynes mere, & à toute la maison de France : mais quant au peuple François, il l'a rendu de tous points miserable, singulierement les hōmes qui estoient de mesme opiniō que luy en la religiō, lesquels (quoy qu'ils feussent deuoyez du vray seruice de Dieu) toutefois pour estre vne partie d'eux modestes, doux & paisibles, ils ont enduré mille indignes vexatiōs & miseres à cause de luy. C'est luy qui les a armez contre le Roy, & le Roy contre eux. C'est luy qui est cause que le peuple Catholique s'est si cruellement esmeu & irrité contre tous ceux de ceste religion. Car depuis qu'il eust changé la dispute de la religion en faction, & qu'il eust bandé les Catholiques & les huguenots les vns contre les autres,

autres, de sorte qu'on ne songeoit plus sinõ, lequel des deux partis demeureroit le plus fort, & non lequel mieux seruiroit Dieu: c'est alors que commencerent non seulement ces iugemens, confiscations, proscriptions & batailles contre ceulx qui portoient les armes & tenoient la campagne: aussi ces cõuices & opprobres du peuple catholique contre ceulx qui n'auoient point d'armes, & ne desiroient que paix: & ces meurtres & massacres parmy les villes que nous auons veu, d'où sont sorties des haines implacables & des appetits de vengeance, qui redondoient & regorgeoient sur le temps de paix, & fournissoient aux chefs, qui en estoient bien aises, d'une perpetuelle amorce de sedition, & nous faisoient veoir toutes choses hostiles & sanglantes, au milieu de la paix. Il n'y a personne qui ait tant gaigné à la mort du feu Admiral, que ceulx qui l'ont ploré & regretté: lesquels de son viuant n'eussent iamais eu aucun repos, ny vn seul bien: au contraire, toute sorte de maulx & de miseres les menassoient & pressoient. Que fils se rauissent vne fois, & esueillent du sommeil où ils sont, ils hairont la memoire de ce personnage à iamais: & autant qu'ils ont enduré de maulx de son viuant, & à cause de luy, autant de biens, maintenant qu'il est mort, espereront ils & obtiendront du Roy trefchrestien, trefclement, & trefbon.

La nature a fait nostre Roy, comme il a tousiours esté cogneu des son enfance, clement, doux & bening: ceste clemence & douceur naturelle qui est nee avec luy, a esté conseruee & augmentee par la tressage & tresbonne education de la Roynes sa mere, & confirmee par sa volonté & accoustumance continuelle. Le vestemēt & masque de feuerité luy fut dernièrement, pour vn peu de temps, necessaire, à fin de reprimer la fureur des coniurez, & se garantir du peril eminent. Mais comme mal gré soy, & à regret, il fut contrainct de se parer & vestir de telles armes: aussi apres que le danger fut passé, il s'en despouilla incontinēt, & le mesme iour qu'il les auoit essayees, & ce tāt de son propre mouuemēt, que par le conseil de la Roynes sa mere, que Dieu a douee d'vne clemēce singuliere, & à la priere de Messeigneurs ses freres, Princes tresbōs & treshumains. Le reste de sa vie demurant tousiours semblable au cours precedēt, il retiendra à iamais la clemence qu'il a tousiours sainctement gardee & obseruee, & naguieres pour vn petit moment de temps, & pour le salut commun, plustost doucement suspendue, que intermise ou aucunement discontinuee.

A la mienne volonté que quelques restes de l'anciēne folie qui tourmentēt encores la Guienne, & cest endroit de la France où ie suis né, se guerissent.

guerissent aussi aisément, comme il sera aisé au Roy treschrestien de tousiours perseuerer en sa clemence accoustumee : mais si l'opiniastre temerité d'aucuns rebelles requiert cy apres, que le Roy vse encore de rigueur enuers eulx, il sera possible contrainct d'estre seuer contre les hautains & superbes : mais comme nulle chose ne la onques fait par le passé cruel, aussi nulle perfidie de ses subiects, nulle iniquité du temps, nul propos des mesdisans & calomniateurs ne l'en fera iamais à l'aduenir.

Ceste affirmation faicte par moy de nostre Roy sera aisémēt creuë de vous (Seigneur Eluide) qui de ce tresbõ Roy auez desia de vous mesmes vne tresbonne opinion: i'espere aussi que ie la persuaderay facilement à tous gens de bien & equitables. Pour encores persuader la verité à tous autres, si estoit possible, i'ay esté plus long que ne requeroit la nature d'une Epistre, ny possible vos grandes occupations, & l'estude des haultes sciences auquel vous vous employez avec los singulier & celebrité grande.

Mon desir a esté & sera tousiours, que le Roy treschrestien, & tous nous autres François soions tenuz & reputes pour tels que nous sommes : & espere qu'en brief ceste nuit & obscurité de calomnies & faulx-bruiets, estant chassée, le clair, & resplēdissant Soleil de verité, & de l'innocence &

intégrité François apparoiſtra. Que ſil aduient plus tard que la raiſon ne voudroit, nous nous maintiendrōs fermes & cōſtans contre les calomnies des malins, & contre la crédulité des hommes legers & volages, nous appuyans ſur noſtre innocence, & nous arreſtans aux iugemens & aduis des plus ſages & meilleurs. Et pour les propos d'un peu d'hommes iniques & legers, nous ne bougerons pourtant de noz façons accouſtumees, tant ſ'en fault que nous puiſſions nous repentir iamais de la conſeruation du Roy, de la Roynē ſa mere, de Meſſeigneurs ſes freres, & de la proſperité de ceſt eſtat.

De Paris ce premier iour de Nouembre, mil cinq cents ſoixante & douze.

